
Na osnovu člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08) i člana 24. Pravilnika o oznakama originalnosti i oznakama geografskog porijekla hrane ("Službeni glasnik BiH", broj 27/10), Vijeće ministara Bosne i Hercegovine, na prijedlog Agencije za sigurnost hrane Bosne i Hercegovine, na 77. sjednici održanoj 13. oktobra 2016. godine, donijelo je

**ODLUKU
O DAVANJU OVLAŠTENJA PRAVNIM LICIMA ZA
OBLAST OZNAKE ORIGINALNOSTI I OZNAKE
GEOGRAFSKOG PORIJEKLA PREHRAMBENIH
PROIZVODA**

Član 1.

(Predmet)

- (1) Ovom odlukom ovlašćuju se pravna lica (u daljnjem tekstu: certifikacijska tijela) za utvrđivanje usklađenosti proizvodnje, prerade i samog prehrambenog proizvoda sa specifikacijom i provođenje kontrole nad proizvodnjom, preradom i samim prehrambenim proizvodom.
- (2) Ovlaštenje iz stava (1) ovog člana odnosi se na oznake originalnosti i oznake geografskog porijekla prehrambenih proizvoda.

Član 2.

(Ovlašćivanje)

- (1) Za utvrđivanje usklađenosti proizvodnje, prerade i samog prehrambenog proizvoda sa specifikacijom i provođenje kontrole nad proizvodnjom, preradom i samim prehrambenim proizvodom, a na osnovu provedenog Javnog konkursa, ovlašćuju se sljedeća certifikacijska tijela:
 - a) Herkon d.o.o. Mostar,
 - b) Organska kontrola d.o.o. Sarajevo.
- (2) U skadu s članom 25. stav (2) Pravilnika o oznakama originalnosti i oznakama geografskog porijekla hrane ("Službeni glasnik BiH", broj 27/10), certifikacijsko tijelo dužno je dobiti akreditaciju od Instituta za akreditiranje Bosne i Hercegovine ili drugog međunarodno ovlaštenog akreditacijskog tijela prema zahtjevima standarda BAS EN 45011 ili ISO Vodiča 65, u roku od dvije godine od dana ovlaštenja.

Član 3.

(Zadatak)

- (1) Zadatak certifikacijskog tijela iz člana 2. stava (1) ove odluke je utvrđivanje usklađenosti proizvodnje, prerade i samog prehrambenog proizvoda sa specifikacijom i provođenje kontrole nad proizvodnjom, preradom i samim prehrambenim proizvodom.
- (2) Nadzor nad radom certifikacijskog tijela provodi Agencija za sigurnost hrane Bosne i Hercegovine (u daljnjem tekstu: Agencija).

Član 4.

(Zahtjev za utvrđivanje usklađenosti)

- (1) Postupak utvrđivanja usklađenosti prehrambenog proizvoda sa specifikacijom provodi se prije pokretanja postupka registracije oznake originalnosti, odnosno oznake geografskog porijekla i prije pokretanja postupka za upis prava upotrebe registrirane oznake originalnosti, odnosno registrirane oznake geografskog porijekla.
- (2) Zahtjev za provođenje postupka utvrđivanja usklađenosti podnosi se certifikacijskom tijelu.
- (3) Zahtjev iz stava (2) ovog člana sadrži:
 - a) podatke o podnosiocu zahtjeva, odnosno udruženju, te o svakom njenom pojedinom članu, koji je proizvođač, odnosno prerađivač prehrambenog proizvoda za koji se traži oznaka ili pravo upotrebe registrirane oznake (ime i prezime, odnosno naziv pravnog ili fizičkog lica ili poljoprivrednog porodičnog domaćinstva, punu adresu, odnosno sjedište te njihov matični broj, a u slučaju udruženja također i pravni status udruženja);
 - b) naziv prehrambenog proizvoda uključujući i naziv oznake originalnosti ili oznake geografskog porijekla;
 - c) specifikaciju proizvoda;

- d) dokaze o zadovoljavanju svih općih ili posebnih uslova higijene u proizvodnji i preradi prehrambenog proizvoda;
- e) opis unutrašnje kontrole te način vođenja dokumentacije proizvodnje.

Član 5.

(Prva kontrola)

- (1) Na osnovu podnesenog zahtjeva iz člana 4. stav (2) ove odluke, certifikacijsko tijelo prije prve kontrole priprema uputstva za njeno provođenje.
- (2) Nakon provedene kontrole sastavlja se zapisnik koji se dostavlja proizvođaču, odnosno prerađivaču.
- (3) Ako se utvrde nedostaci u proizvodnji ili preradi prehrambenog proizvoda, u zapisniku se zahtjeva njihovo uklanjanje.
- (4) Nakon što se ustanovi da su svi nedostaci uklonjeni, certifikacijsko tijelo izrađuje završni izvještaj.
- (5) Ako je završni izvještaj pozitivan, certifikacijsko tijelo podnosiocu zahtjeva izdaje potvrdu o usklađenosti.

Član 6.

(Kontrola)

- (1) Kontrolu pravnih ili fizičkih lica, koja proizvode ili prerađuju prehrambeni proizvod sa oznakom originalnosti, odnosno oznakom geografskog porijekla, provodi certifikacijsko tijelo u skladu s planom kontrole.
- (2) Plan kontrole izrađuje certifikacijsko tijelo, prema uputstvima Agencije.
- (3) Plan kontrole odobrava Agencija.
- (4) U proizvodnji se kontrola obavlja najmanje jednom godišnje, ako planom kontrole nije drugačije određeno.
- (5) Nakon obavljene kontrole, certifikacijsko tijelo je o tome dužno obavijestiti Agenciju i na njen zahtjev dostaviti joj zapisnik o kontroli.
- (6) Ako se kontrolom utvrdi da prehrambeni proizvod više nije u skladu sa specifikacijom, certifikacijsko tijelo predlaže Agenciji da se proizvođač, odnosno prerađivač briše iz Registra oznaka, te o tom postupku certifikacijsko tijelo obavještava fizičko ili pravno lice nad kojim je proveden postupak kontrole.

Član 7.

(Obim proizvodnje)

- (1) Proizvođači, odnosno prerađivači prehrambenih proizvoda koji nose oznaku originalnosti, odnosno oznaku geografskog porijekla, dužni su dostaviti podatke o količinama sirovina i izvještaj o količini proizvedenih prehrambenih proizvoda certifikacijskom tijelu u skladu s planom kontrole.
- (2) Certifikacijsko tijelo dužno je, na zahtjev Agencije, dostaviti sve tražene podatke iz stava (1) ovog člana.

Član 8.

(Stupanje na snagu)

Odluka stupa na snagu danom donošenja i objavljuje se u "Službenom glasniku BiH".

VM broj 241/16
13. oktobra 2016. godine
Sarajevo

Predsjedavajući
Vijeća ministara BiH
Dr. Denis Zvizdić, s. r.